

傷寒論

卷三

註解傷寒論卷第四

漢張仲景著

晉王叔和撰次

宋成無己註

明汪濟川校正

辨太陽脈證并治下第七

問曰病有結胸有藏結其狀何如答曰按之痛寸脈浮關脈沉名曰結胸也何謂藏結答曰如結胸狀飲食如故時時下利寸脈浮關脈小細沉緊名曰藏結舌上白胎滑者難治

結胸者邪結在胸藏結者邪結在藏二者皆下後邪氣乘虛入裏所致下後邪氣入裏與陽相結者爲結胸以陽受氣於胸中故爾與陰相結者爲藏結以陰受之則入五藏故爾氣宜通而塞故痛邪結陽分則陰氣不得上通邪結陰分則陽氣不得

下通是二者皆心下鞭痛寸脈浮關脈沉知邪結在陽也寸脈浮關脈小細沉緊知邪結在陰也陰結而陽不結雖心下結痛飲食亦自如故陰氣乘腸虛而下故時時自下利陰得陽則解藏結得熱證多則易治舌上白胎滑者邪氣結胸中亦寒故云難治

藏結無陽證不往來寒熱其人反靜舌上胎滑者不可攻也

藏結於法當下無陽證爲表無熱不往來寒熱爲半表半裏無熱其人反靜爲裏無熱經曰舌上如胎者以丹田有熱胸中有寒以表裏皆寒故不可

攻

病發於陽而反下之熱入因作結胸病發於陰而反

下之因作痞所以成結胸者以下之太早故也
發熱惡寒者發於陽也而反下之則表中陽邪入
裏結於胸中爲結胸無熱惡寒者發於陰也而反
下之表中陰邪入裏結於心下爲痞

結胸者項亦強如柔痓狀下之則和宜大陷胸丸方
結胸病項強者爲邪結胸中胸膈結滿心下緊實
但能仰而不能俛是項強亦如柔痓之狀也與大
陷胸丸下結泄滿

大陷胸丸方

大黃

半斤苦寒味

葶苈

半升苦寒味

熬

芒硝

半升寒味

杏仁

半升黑味去皮尖熬

溫

大黃芒硝之苦鹹所以下熱葶苈杏仁之苦甘所
以泄滿甘遂取其直達白蜜取其潤利皆以下泄

滿實物也

右四味搗篩二味內杏人芒硝合研如脂和散取如彈丸一枚別搗甘遂末壹錢七白蜜二合水二升煮取一升溫頓服之一宿乃下如不下更服取下爲效禁如藥法

結胸證其脈浮大者不可下下之則死

結胸爲邪結胸中屬上焦之分得寸脈浮關脈沉者爲在裏則可下若脈浮大心下雖結是在表者猶多未全結也下之重虛邪氣復結則難可制故云下之則死

結胸證悉具煩燥者亦死

結胸證悉具邪結已深也煩燥者正氣散亂也邪氣勝正病者必死

太陽病脈浮而動數浮則爲風數則爲熱動則爲痛
數則爲虛頭痛發熱微盜汗出而反惡寒者表未解
也醫反下之動數變遲膈內拒痛胃中空虛客氣動
膈短氣躁煩心中懊憹陽氣內陷心下因鞭則爲結
胸大陷胸湯主之若不結胸但頭汗出餘無汗劑頸
而還小便不利身必發黃也

動數皆陽脈也當責邪在表睡而汗出者謂之盜
汗爲邪氣在半表半裏則不惡寒此頭痛發熱微
盜汗出反惡寒者表未解也當發其汗醫反下之
虛其胃氣表邪乘虛則陷邪在表則見陽脈邪在
裏則見陰脈邪氣內陷動數之脈所以變遲而浮
脈獨不變者以邪結胸中上焦陽結脈不得而沉
也客氣者外邪乘胃中空虛入裏結於胸膈膈中

拒痛者客氣動膈也金匱要略曰短氣不足以息者實也短氣燥煩心中懊惱皆邪熱爲實陽氣內陷氣不得通於膈壅於心下爲鞭滿而痛成結胸也與大陷胸湯以下結熱若胃中空虛陽氣內陷不結於胸膈下入於胃中者遍身汗出則爲熱越不能發黃若但頭汗出身無汗劑頸而還小便不利者熱不得越必發黃也

大陷胸湯方

大黃

六兩去皮苦寒

芒硝

一升鹹寒

甘遂

一錢苦寒

大黃謂之將軍以苦蕩滌芒硝一名硝石以其鹹能煎鞭夫間有甘遂以通水也甘遂若夫間之遂其氣可以直達透結陷胸三物爲允

右三味以水六升先煮大黃取二升去滓內芒硝煮

一兩沸內甘遂末溫服一升得快利止後服

傷寒六七日結胸熱實脈沉而緊心下痛按之石鞭者大陷胸湯主之

病在表而下之熱入因作結胸此不云下後而云傷寒六七日則是傳裏之實熱也沉爲在裏緊爲裏實以心下痛按之實鞭是以爲結胸與大陷胸湯以下結熱

傷寒十餘日熱結在裏復往來寒熱者與大柴胡湯但結胸無大熱者此爲水結在胸脅也但頭微汗出者大陷胸湯主之

傷寒十餘日熱結在裏是可下之證復往來寒熱爲正邪分爭未全斂結與大柴胡湯下之但結胸無大熱者非熱結也是水飲結於胸脅謂之水結

胸周身汗出者是水飲外散則愈若但頭微汗出
餘處無汗是水飲不得外泄停畜而不行也與大
陷胸湯以逐其水

太陽病重發汗而復下之不大便五六日舌上燥而
渴日晡所小有潮熱從心下至少腹鞭滿而痛不可
近者大陷胸湯主之

重發汗而復下之則內外重亡津液而邪熱內結
致不大便五六日舌上燥而渴也日晡潮熱者屬
胃此日晡小有潮熱非但在胃從心下至少腹鞭
滿而痛不可近者是一腹之中上下邪氣俱甚也
與大陷胸湯以下其邪

小結胸病正在心下按之則痛脈浮滑者小陷胸湯
主之

心下鞭痛手不可近者結胸也正在心下按之則
痛是熱氣猶淺謂之小結胸結胸脈沉緊或寸浮
關沈今脈浮滑知熱未深結與小陷胸湯以除胸
膈上結熱也

小陷胸湯方

黃連一兩

苦寒

半夏半升

辛溫洗

括蔞實大者一箇

味苦寒

苦以泄之辛以散之黃連括蔞實苦寒以泄熱半
夏之辛以散結

右三味以水六升先煮括蔞取三升去滓內諸藥煮
取二升去滓分溫三服

太陽病二三日不能臥但欲起心下必結脈微弱者
此本有寒分也反下之若利止必作結胸未止者四
日復下之此作協熱利也

太陽病二三日邪在表也不能臥但欲起心下必結者以心下結滿臥則氣壅而愈甚故不能臥而但欲起也心下結滿有水分有寒分有氣分今脈微弱知本有寒分醫見心下結而反下之則太陽表邪乘虛入裏利止則邪氣留結爲結胷利不止至次日復如前下利不止者是邪熱下攻腸胃爲挾熱利也

太陽病下之其脈促不結胸者此爲欲解也脈浮者必結胸也脈緊者必咽痛脈弦者必兩脅拘急脈細數者頭痛未止脈沈緊者必欲嘔脈沈滑者協熱利脈浮滑者必下血

此太陽病下之後邪氣傳變其脈促者爲陽盛下後脈促爲陽勝陰也故不作結胸爲欲解下後脈

浮爲上焦陽邪結而爲結胸也經曰結胸者寸脈
浮關脈沈下後脈緊則太陽之邪傳於少陰經曰
脈緊者屬少陰內經曰邪客於少陰之絡令人咽
痛不可內食所以脈緊者必咽痛脈弦則太陽之
邪傳於少陽經曰尺寸俱弦者少陽受病也其脈
循脅絡於耳所以脈弦者必兩脅拘急下後邪氣
傳裏則頭痛當止脈細數爲邪未傳裏而傷氣也
細爲氣少數爲在表故頭痛未止脈沈緊則太陽
之邪傳於陽明爲裏實也沉爲在裏緊爲裏實陽
明裏實故必欲嘔脈滑則太陽之邪傳於腸胃以
滑爲陰氣有餘知邪氣入裏干於下焦也沉爲血
勝氣虛是爲協熱利浮爲氣勝血虛是知必下血
經曰不宜下而便攻之諸變不可勝數此之謂也

病在陽應以汗解之反以冷水灌之若灌之其熱被却不得去彌更益煩肉上粟起意欲飲水反不渴者服文蛤散若不差者與五苓散寒實結胸無熱證者與三物小陷胸湯白散亦可服

病在陽爲邪在表也法當汗出而解反以冷水灌之灌洗熱被寒水外不得出則反攻其裏彌更益煩肉上粟起者水寒之氣客於皮膚也意欲飲水者裏有熱也反不渴者寒在表也與文蛤散以散表中水寒之氣若不差是水熱相搏欲傳於裏與五苓散發汗以和之始熱在表因水寒制之不得外泄內攻於裏結於胸膈心下鞭痛本是水寒伏熱爲實故謂之寒實結胸無熱證者外無熱而熱悉收斂於裏也與小陷胸湯以下逐之白散下熱

故亦可攻

文蛤散方

文蛤

鹹五兩
寒味

鹹走腎邪可以勝水氣

右一味爲散以沸湯和一錢匕服湯用五合
白散方

桔梗

三分苦味辛

芭豆

一分黑研去皮心熬
三分研如脂平溫

貝母

三分辛苦平味

辛散而苦泄桔梗貝母之苦辛用以下氣芭豆之
辛用以散實

右件三味爲末內芭豆更於白中杵之以白飲和服
強人半錢羸者減之病在膈上必吐在膈下必利不
利進熱粥一杯利過不止進冷粥一杯身熱皮粟不

解欲引衣自覆者若水以灌之洗之益令熱却不得出當汗而不汗則煩假令汗出已腹中痛與芍藥三兩如上法

太陽與少陽併病頭項強痛或眩冒時如結胸心下痞鞭者當刺大椎第一間肺俞肝俞慎不可發汗發汗則讌語脈弦五六日讌語不止當刺期門

太陽之脈絡頭下頃頭項強痛者太陽表病也少陽之脈循胸絡脇如結胸心下痞鞭者少陽裏病也太陽少陽相併爲病不純在表故頭項不但強痛而或眩冒亦未全入裏故時如結胸心下痞鞭此邪在半表半裏之間也刺大椎第一間肺俞以瀉太陽之邪刺肝俞以瀉少陽之邪邪在表則可發汗邪在半表半裏則不可發汗發汗則亡津液

損動胃氣少陽之邪因干於胃土爲木刑必發讞語脈弦至五六日傳經盡邪熱去而讞語當止若復不止爲少陽邪熱甚也刺期門以瀉肝膽之氣婦人中風發熱惡寒經水適來得之七八日熱除而脈遲身涼胸脇下滿如結胸狀讞語者此爲熱入血室也當刺期門隨其實而瀉之

中風發熱惡寒表病也若經水不來表邪傳裏則入府而不入血室也因經水適來血室空虛至七八日邪氣傳裏之時更不入府乘虛而入於血室熱除脈遲身涼者邪氣內陷而表證罷也胸脇下滿如結胸狀讞語者熱入血室而裏實期門者肝之募肝主血刺期門者瀉血室之熱審看何經氣實更隨其實而瀉之

婦人中風七八日續得寒熱發作有時經水適斷者此爲熱入血室其血必結故使如瘧狀發作有時小柴胡湯主之

中風七八日邪氣傳裏之時本無寒熱而續得寒熱經水適斷者此爲表邪乘血室虛入於血室與血相搏而血結不行經水所以斷也血氣與邪分爭致寒熱如瘧而發作有時與小柴胡湯以解傳經之邪

婦人傷寒發熱經水適來晝日明了暮則讖語如見鬼狀者此爲熱入血室無犯胃氣及上二焦必自愈傷寒發熱者寒已成熱也經水適來則血室虛空邪熱乘虛入於血室若晝日讖語爲邪客於府而陽爭也此晝日明了暮則讖語如見鬼狀是邪不